

El riego en Palacios del Sil

ROBERTO GONZÁLEZ-QUEVEDO GONZÁLEZ

ECHAR L' AUGUA

En Palacios del Sil, onde hai un gran ríu, *El Ríu Sil*, ya outros dous ríos pequeños pero con muita augua, *El Ríu Palacios* ya *El Ríu Pedrosu*, aprovéitase l'augua pa regar praos ya tierras ya l.lograr asina una producción muito más grande. Tamién una fuente pue valir pa regar un prau ou unos cuantos praos ya en Palacios del Sil puen identificase más de sesenta manantiales utilizaos pa l.llevar l'augua a los praos.

El clima n'El Val.le del Sil yía mui chuviosu, pero nel branu suel haber una época d'escasez d'humedá ya ésta yía una de las causas seguramente de qu'haiga unos sistemas de riego grandes ya complexos, aunque tamién hai que tener en cuenta la muita permeabilidá de la tierra. Los informantes dicen que fai falta regar los praos porque gracias a *echar l'augua* pue l.lograse una producción más importante de yerba, pero dan tamién outras dúas razones: en primer l.lugar, gracias al augua no iviernu nun xelan los praos porque l'augua pasa continuamente ya nun dexa que cuache'l xelu; en segundu l.lugar, l'augua val pa matar los bichos qu'afuracan los praos ya sirve pa desanicar las topineras. Quier esto dicir que,

según los informantes, l'augua de riego nun yía namás una estratexa escontra la falta d'humedá, sinón que tien tamién outros oxetivos como bien pue demostrase na realidá de que los praos riéganse tamién nel iviernu ya mesmamente cuando chueve.

El riego faise fundamentalmente gracias al augua que traen los ríos. Pa poder garrar l'augua faise, entós, nel ríu un *banzáu*, que yía una paré de piedra, *torrones* (trozos de tierra de prau), mofu ya tapín, anque modernamente tamién la xente usa materiales como'l plásticu. L'oxetivu del banzáu que se fai no ríu yía embalsar l'augua (chá-mase tamién banzáu a la masa d'augua que s'axunta pola mor de la paré de piedra). Los banzaos puen ser estables ou non: normalmente los banzaos grandes duran muitos meses ya repítense anu tras anu, mientras que los banzaos pequenos puen quitase d'un día pa outro.

L'augua va por distintas *presas* hasta diferentes sitios del pueblu gracias a un sistema mui complicáu ya bien feitu. Las presas fáense na tierra ya pa trabachar nel.las úsase'l *picachu* ya la *batedera*. Las presas van subdividéndose ya mandando l'augua a los praos d'una parte ya outra: pa mandar l'augua a un sitiu ou outro úsanse los *atapos*, pequeñu atranque que se fai con unas piedras ya torrones ya tapines. Cuando la presa atraviesa un caminu ou sendeiru hai una puentina de llousa, que se chama *pontón*. En chegando l'augua al prau, repártese por tola superficie gracias a los *duviachos*: el *duviachu* yía una canalina que fai posible que denguna parte del prau quede seca ya tolos anos hai que refaer ya restaurar bien el sistema de *duviachos*. A la hora d'echar l'augua ou regar la xente va siempre con una *batedera* (o con un *picachu*) p'ayudar a que l'augua se meta pa tolas *viciel.las*.

Chámase *esbancare l'augua* a l'aición d'esfaer un banzáu ou un atapu de manera que l'augua que va a una presa esvíase pa que vaya a una distinta, quitando componentes del banzáu, del atapu ou d'una mesma presa (*esbancare* significa tamién 'quitar l'augua a outru'). Pa poder regar nun basta una persona, sinón que fai falta qu'intervengan polo menos dúas personas ya mechor si son más: en realidá, tola familia se pon en movimientu cuando chega la hora de char l'augua.

A la hora d'estudiar la forma d'echar l'augua, cousa que tamién s'alcuentra n'outros sitios de montaña de Galicia ya d'Asturias, extremo cinco sistemas diferentes de riego: el sistema de los praos de los val.les d'El Ríu Pedrosu ya d'El Ríu Palacios, el sistema de los praos cercanos al pueblu, el sistema de los praos d'El Ríu Sil, el sistema de los praos de fuente ya'l sistema de las tierras de cultivu. Nestos cinco sistemas de riego hai distintas estratexas de comportamientu, que van de la cooperación al enfrentamientu, pasando pol usu de l'astucia ya tamién pol emplegu del orde rotatoriu de la *vecera*.

EL SISTEMA DE LOS PRAOS DE LOS VAL.LES D'EL RÍU PEDROSU YA D'EL RÍU PALACIOS

Esti sistema yía'l que s'alcuentra nestos dous val.les, al llau d'estos dous ríos, que tienen a los l.laos una tira de praos que dan yerba abonda de la primavera al outueñu. Son praos pequeños, que dan de dous a tres carros de yerba ya que tán estremaos por paredes de piedra. Esti sistema de riego aproveita'l gran desnivel pol que baxan los dous ríos. Estas auguas nun conocen diez metros de chanura: dende que nacen hasta que chegan

a El Sil nun faen más que faer espuma ya baxar con muita fuerza d'un pozu a outro.

Cada trenta ou cuarenta metros un banzáu pequenu apara las auguas pa l.lievalas por una presa a los praos. Estos banzaos nun son fixos, sinón que se faen ya desfaen según cuadre ya interese. Con una pouquina d'esperiencia puede *esbancase l'augua* (esfaer el banzáu ya echar l'augua pa outro sitiu) quitando las piedras suficientes pa que nun pare l'augua. De la mesma manera, en diez minutos pue faese outra vuelta un banzadín d'estos. Esti yía'l sistema de los val.les en cuantas al sou aspeutu físicu. Pero ¿cómo yía la estratexa que socialmente s'emplega nesti sistema?

La estratexa de riego nestos praos yía l'*astucia*. Anque hai augua abonda, la verdá yía qu'hai competición, porque hai muitos praos ya muitos dueños. Amás, mientras que nun momentu determináu naide quier l'augua, unas horas más tarde puen ser dous ou tres propietarios los que tienen interés en regar los praos próximos na mesma parte del ríu. Hai que tener en cuenta que muchos d'estos praos tán l.luenxe del pueblu ya esixen, entós, muita inversión de tiempu ya d'esfuerzu físicu pa dir a ellos a echar l'augua ya entós podía esperase qu'hubiera un alcuertu d'horarios (una vecera) o, si non, qu'hubiera griesca ya discusión. Pero lo que chama l'atención yía que nesti sistema nin hai vecera nin reñe la xente, sinón que que la xente riega cuando yía capaz usando l'astucia. Trátase, por exemplu, d'echar l'augua ya l.lograr que naide venga a quitalahasta que'l prau ou los praos queden bien regaos. El que riega tien que dedicar, entós, muchos esfuerzos pa vixilar el comportamientu de los outros propietarios, controlar las horas l.libres que tien, estudiar ónde s'alcuentra nesos momentos ya calcular

cuálos ratos son los mechores pa xubir al prau ya alcontrar más facilidá pa regar ya que naide-l.ly quite l'augua.

Esto fai que cueste más trabachu regar, porque hai qu'andar siempre vixilando a la xente ya escondiéndose mesmamente pa vixilar ya tien consecuencias nas relaciones ente los propietarios ya usuarios de los praos, chegando a unas conclusiones interesantes: por exemplu, dous competidores nesti sistema nun reñirán nin s'enfrentarán pol augua, pero xenerarán una gran desconfianza ente el.los que pue afeutar a las relaciones ente las familias, pero siempre non abiertamente.

Nun hai denguna regla moral ou social nesta estratexa de riego: namás funciona l'astucia, anque yía verdá que la xente nun ve bien a los que son más avariciosos de la cuenta.

Outramiente, los trabachos de vixilar, engañar ya quitar l'augua a los demás son fundamentalmente trabachos masculinos. Anque si falta l'home yía la mucher la que tien que faer estos l.labores, yía más propia de los paisanos la cousa d'andar vixilando, engañando ya compitiendo pol augua de los val.les.

Los praos de los val.les riéganse práuticamente tolos meses del anu, quitando namás la época de pacer las vacas ya la época de la yerba. Paez qu'asina yía un comportamientu irracional, porque mesmamente nel iviernu ya mientras chueve vense los praos inundaos d'augua del ríu, pasando asina meses ya meses. Dengún ganadeiru niega la eficacia del principiu de que "cuanta más augua, mechor". Tou ganadeiru piensa que pa tener yerba los praos tienen que regase nel iviernu ya diz esto el reflán: *¿Onde crez la yerba? Onde l'augua inverna.*

Alcontréi tres argumentos a favor d'esti riego intensivu. En primer l.lugar, diz la xente que gracias a tar mui

regaos estos praos nun necesitan cuitu, de forma que l'augua val pa sustituir el llabor d'acuitar. Otru argumentu que dan los ganadeiros yía que gracias al augua que cuerre tol anu pol prau esti nun xela: ou seya, hai tanta friura pol iviernu que si nun yía pol augua corriente los praos quedarían queimaos pola xelada. Ya un tercer argumentu a favor de regar día ya nueite pol iviernu yía que l'augua val p'afogar a los toupos ya pa que nun haiga topineras. En definitiva, como yá se dixera antias, la xente diz que por esperiencia sabe que cuanto más se riegue un prau pol iviernu más dará de primavera a outuenu.

Na tradición oral alcuéntrase dalguna hestoria que se refier al engañu na estratexa de regar los praos. Tenemos, por exemplu, el cuentu de Xuan ya Maruxa, que se cuenta como verdadeiru ya real, según el cual un día Xuan vistíuse con una sábana blanca pa paecer un fantasma ya asustar a Maruxa, que competía con él pa regar ya taban tol tiempu quitándose l'augua unu a outru.

Xuan escondíuse tapáu cona sábana ya cuando llegó Maruxa al ríu pola nueite Xuan saltóu delante d'ella ya asustóula fayendo estrueldu de fantasma. La mucher echóu a correre pal pueblu ya Xuan, cuando se víu solu cona sábana blanca no monte ya de nueite, asustóuse tanto qu'echóu tamién a correr pal pueblu gritando a Maruxa:

¡A, Maruxa, aspera que soi Xuan, aspera que soi Xuan!

EL SISTEMA DE LOS PRAOS DEL PUEBLU

Los que se chaman aquí praos del pueblu son los que se riegan pol sistema más grande ya complexu de riego, ou seya'l Sistema Central de Riego (SCR).

El SCR garra l'augua d'El Ríu Palacios, concretamente nel sitiu que se chama *L'Esbancadeiru*, onde hai un sistema de morrillos bien grandes ya torrones que valen pa repartir el caudal d'*El Ríu Palacios* pa tres conductos que van atravesando *La Corrada los Regueirales* (ou *La Corrada l'Esbancadeiru*): *La Presa de la Poula*, *La Presa'l Pueblu* ya *La Presa la Tabierna*. Estas tres presas reparten l'augua por cuasi tolos praos del pueblu ya tamién las tierras, como podrá vese más alantre. El piquín d'arriba de *La Corrada los Regueirales* atraviésalu *La Presa de la Poula*, que riega los praos de *La Poula*. No mediu de *La Corrada los Regueirales* alcuéntrase *La Presa'l Pueblu*. Ya *La Presa la Tabierna* atraviesa la parte d'abaxo de *La Corrada los Regueirales* ya termina n'*El Canalón*. A partir d'estas tres grandes presas l'augua chega a los praos, corradas ya l.linares qu'hai nel pueblu ya alredu del mesmu. Antias l'augua corría por presas por supuestu descubiertas, pero agora gran parte del augua va por tubos que se reparten por tolos praos ya tierras del pueblu.

Pola mor de la l.largura del SCR fai falta que pa regar con él haya que llevar a parte de la familia, porque una persona namás nun yía capaz de controlar el riego. Asina, si X quier regar la finca A, tien que tener na operación a outros familiares o, si esto nun yía posible, a dalgún amigu ou persona conocida que-l.ly deba dalgún favor.

Una persona del equipu de riego tendrá que vixilar na zona d'El Esbancadeiru, porque sinón nun hai garantía del que l'auga vaiga pa él y, además, nun tien lexitimidá pa regar. Outros dous ou tres tienen que tar nos puntos clave onde se cruzan ya se dividen de las presas, cuidando que naide quite l'augua ya nun dexando que naide intente tal cousa. Tien qu'haber dalguién tamién,

lógicamente, na mesma finca A pa encargase de que nel tiempu que tien pa regar (enxamás más d'una hora) pueda l'augua repartise pola finca ya metese bien na tierra.

La canalización subterránea que se fixo con tubos por tol pueblu obligóu a que los antiguos *atapos* seyan agora compuertas de fierro. Yía interesante saber qu'estas compuertas son de propiedá privada ya, entós, pa regar hai que l.levar la compuerta ou compuertas. A veces la compuerta yía propiedá de varios ya van empréstándolas unos a outros según las van necesitando los regantes.

Anque los praos del pueblu necesitan más personal pa regar, tienen la ventaxa de tar cerca de las casas ya necesitar menos inversión de tiempu ya de movimientu. Suelen ser praos buenos ya de gran producción. Los que tán mui cerca de la población suelen ser *corradas*, que tienen una paré alreduor ya xeneralmente nun se dexan pa la siega, sinón que s'usan pal pastu ya pal corte de yerba verde. Como veremos más alantre, el riegü d'estos praos ya *corradas* yía'l que menos cuesta, si dexamos aparte'l casu de los praos con fuente propia.

EL RIEGU DE LOS PRAOS DEL PUEBLU COMO ESTRATEXA ECONÓMICA: LA VECERA

Las mesmas razones que mueven a regar tol anu los praos de los val.les mueven aquí a regar estos praos tamién. Procúrase tamién tenelos bien regaos tol anu menos na época de pacer ya de la siega, porque asina siempre darán más. Sicasí, veremos que la competencia pol augua resuélvese de forma distinta.

Pol iviernu hai augua a farta porque'l SCR nun s'usa más que pa estos praos. Tampoco fai falta entós un tur-

nu horariu nin enfrentase con competidor dengún. Como los praos tán cerca, la competencia yía menor porque si nun se riega agora pue regase un momentu más tarde. Los problemas de competencia chegan nel branu, porque hai qu'usar el SCR pa regar las tierras de cultivu ya hai menos tiempu pal riego.

La solución a esti problema d'escasez ya de competencia yía la que paez más razonable en principiu: faise un turnu horariu pola nueite, una vecera, según la que van regándose los praos nun orde mui rigurosu. L'horariu d'esta vecera entama a las siete de la tarde ya chega hasta las siete de la mañana. Pero anque haya vecera, siempre pue haber dalguién que quiera aproveitase de los demás ya por eso hai que tener tamién nestos casos ayudantes que, puestos nos sitios claves del SCR, vixilen l'augua. Anque cona vecera las cousas van mechor, nun se desanicia con el.la la posibilidá de que dalguién engañe ya con astucia-l.ly quite l'augua al que-l.ly toca regar según la vecera.

EL SISTEMA DE LOS PRAOS D'EL RÍU SIL

Chamamos praos d'El Ríu Sil a los que se riegan con augua d'esti gran ríu. Son praos buenos, anque en más d'una ocasión sufren los ataques del ríu cuando crez (*cachumbadas*) ya puede chegar a comer la tierra. Yía una realidá que muitos praos de la *marina* (marxe del ríu) son *l.leirones* (o seya, praos chenos de piedra ya morrillos pola mor del augua del ríu).

Como El Ríu Sil tien augua a esgaya ya cuerre con muita fuerza, nun se pue faer dengún banzáu estable, porque pol iviernu esti ríu esbarrumbaría tolos banzaos

que quieran faese. Pola cueta, lo qu'hai que faere yía poner delante los praos grandes paredones de piedra envueltos en tela metálica (*gaviones*) pa que l'augua del ríu nun arranque cachos de prau. Tamién pol branu podrá ponese dalgún banzáu nel ríu pa regar, como veremos.

ESTRATExA DE RIEGU N'EL SIL: LA COOPERACIÓN

No riego d'estos praos las presas, grandes ya pequeñas, quedan d'un anu pa outru; pero los banzaos, non, porque, como yá se dixo, el ríu tíralos pol iviernu. Esto quier dicir que tolos branos hai que faer los banzaos d'El Ríu Sil, sabiendo que meses más tarde van caer pola fuerza del augua.

Los banzaos d'El Ríu Sil tienen que tar mui bien feitos, porque tienen qu'aguantar muita augua ya porque tienen una anchura mui grande, como más de trenta metros en dalgún sitiú. Esto significa que pa faer estos banzaos fai falta muita *cooperación*, cooperación de tolos que más tarde quieren regar gracias al banzáu.

Alcuérdase un día ya va al sitiú del ríu onde va faese'l banzáu una persona de cada familia que quier regar con dichu banzáu. La familia que nun participa nel l.labor de faer el banzáu nun tien más tarde dereitu a regar con augua d'esi banzáu, anque'l sou prau quede al l.lau de las presas. Esta cooperación dase tamién al riego que se fai en fayendo'l banzáu: respétanse los turnos de la vecera ya resulta mui tranquilu'l l.labor de regar estos praos.

Esti riego faise namás pol branu, más bien pa que los praos dean muitu outuenu.

SISTEMA DE LOS PRAOS DE FUENTE

En distintos sitios ya valles de Palacios del Sil hai praos que tienen una fuente nel mesmu prau ou bien cerca (*Valdefontán, La Fuente l'Osu, La Reguera l'Ane*, etc.).

D'esti tipu son muitas *l.lamas*, praos que xeneralmente, aunque non siempre, tienen augua ya tienen una parte siempre mochada.

Lóxicamente, no riego d'esti prau nun hai problemas de competencia, aunque la dificultá pue venir de cuando un prau depende de la fuente que naz n'outru prau, propiedad d'outra familia. Xeneralmente nestos casos la costume establez unas lleis que se respetan ya que solucionan los conflictos que puedan apaecer, pero, de tolas maneras, siempre hai una posibilidá de problemas.

Siguiendo la costume del riego nesta zona, estos praos tiénense cuasi siempre regando, menos na época del riego ou de la siega.

SISTEMA DE LAS FINCAS DE CULTIVU

Las tierras de cultivu alcuéntranse nel sitiu más chanu ya fértil pal cultivu. Riéganse, igual que los praos del pueblu, cono SCR.

Esta zona yía bien grande ya son tierras de patacas, de maíz, etc. Cada tierra necesita alrededor de dous riegos pol branu pa ser a llograr una buena producción. Mientras que pa los praos el riego yía siempre buenu, pa las tierras de cultivu hai que tener más cuidáu, porque muita humedanza pue perxudicar el frutu. Yía l'amu de la finca'l que va regulando la necesidá d'augua d'alcuertu cona costume ya cona cara que presenta'l suelu.

Pero anque, como yá se dixo, úsase pa estas tierras el SCR, la verdá yía que la forma de regar yía diferente daféitu. Si la estratexa de regar básase nos praos de los val.lles na *astucia*, nos del praos del pueblu na *vecera* ya nos praos del Sil na *cooperación*,alcontramos que nas tierras de l.labor la estratexa yía de *enfrentamientu* ya *griesca*.

Lo que nun suel pasar al regar los praos, ou seya, la reña, l'insultu ya la pelea resultan bien frecuentes al ponese a regar las tierras.

Cuando dalguién, cuando una familia quier regar las güertas, los güertos, las l.linares, etc., sabe que que va faer una cousa que tien dalgunos peligros. En primer l.lugar, tendrá que repartir a un buen númaru de miembros de la familia nos puntos clave del SCR, siempre con dalguna ferramienta potente nas manos (un *picachu*, una *batedera*) como avisu a los competidores ya como signu de qu'hai resolución pa faer respetar los dereitos que se tienen. En segundu l.lugar, tiense mui presente qu'en cualquier momentu pue un competidor dedicase a insultar ya a faer mesmamente alcordanza d'acontecimientos vergonzosos de los antepasaos ya familiares en xeneral que tengan dalguna hestoria duldosa. En tercer l.lugar, hai que tar preparaos pa defendese d'un ataque físicu, asina como a contestar a los insultos.

Yía interesante observar que tol mundu ta convencíu de que nun hai comportamientu más tolu qu'ésti, porque saben qu'hai augua a esgaya. Al perguntar por quéi la xente s'enfrenta al regar las tierras, la primera contestación que s'escuita yía ésta:

Porque hai mui mala xente ya somos todos un pouco bobos, porque l'augua sobra por tolos l.laos.

Paez que la solución mechor yía poner un sistema de vecera. Tol mundu ta d'alcuierdu ya diz qu'una vecera yía lo ideal ya pue solucionase perfeutamente. Pero tamién la xente ta segura de que yía imposible chegar a poner la querida vecera ya alcuérdase de los fracasos anteriores.

Efeutivamente, obsérvase que los intentos de vecera fracasan siempres, anque nos últimos tiempos empiezan a tener más éxitu. Las causas del fracasu d'esos intentos de poner vecera son los que vienen darréu.

En primer l.lugar, el turnu de vecera nun se respeta, cuando se pon, voluntaria ya espontáneamente (o seya, al revés que nel casu de los praos). Si nun hai un vixilante que controle a la xente la vecera nun funciona al regar las tierras. Cuando hai un vixilante que recibe una cantidá de perras (puestas polos regantes) pol sou trabachu, entós sí funciona esta vecera de las tierras de cultivu, pero yía un l.labor mui malu, porque los vixilantes cansan ya terminan fartos d'escuítar insultos ya amenazas. Tamién hai que tener en cuenta que la persona que se dedica a vixilante cuerre'l peligru de sufrir nas sos relaciones sociales: al dir enfrentándose a una familia ya a outra ya a outra, pue acabar enemistáu con tol mundu.

Asina, tolos anos, al chegar la época de regar las tierras óyense dende las siete de la mañana hasta la nueite chillidos, insultos ya amenazas a esgaya nos puestos clave del SCR, nos qu'hai muita xente celosa de los sos dereitos. Estos dereitos nun tán regulaos, porque nun hai vecera, pero mandan dous principios: riega'l que primeiru ya con más recursos controla'l SCR ya tien que dexar de regar aquel que yá disfrutóu de tiempu abondu de riego según la estensión de la so tierra.

Son mui interesantes las contestaciones de la xente al perguntar por qué hai tanta griesca al regar, cuando se reconoz qu'hai augua a farta. Chama l'atención qu'ente los homes hai una contestación más bien "machista", en cuantas que dicen qu'hai griesca porque'l riego "yía una cousa de mucheres" ya las mucheres "nun s'atienen a razones, nun faen más que discutir". Por supuestu, esta contestación nun respunde a dengún tipu de realidá: en primer l.lugar, hai que tener en cuenta que tamién los homes participan na griesca del riego. En segundu l.lugar, yía verdá que nel 90% de los casos son mucheres las que protagonizan la griesca, pero eso yía porque son las mucheres las encargadas del trabachu diariu del cultivu de las tierras.

EL SISTEMA D'ESTRATEGIAS DE RIEGU

Vemos qu'hai gran diversidá d'estrategias a seguir nos sistemas de riego. Dexando a un l.lau a los praos con fuente, vemos qu'hai cuatro estrategias que van dende una situación de muita cooperación hasta l'enfrentamientu más fondu:

Cooperación	Vecera	Astucia	Griesca
-------------	--------	---------	---------

¿Por qué estas diferencias? Dicíamos qu'una de las esplicaciones recochidas ente los paisanos informantes yera que cuando había mucheres pol mediu entós había griesca porque nun sabían "atenese a razones". Yía significativu'l feitu de que nel casu estremu de cooperación, nos praos d'El Ríu Sil, el l.labor de cooperación entama cono trabachu en común de los homes. Ou seya,

un trabachu fundamentalmente masculín que determinará la forma de cooperación de tolos siguientes l.labores de riego. Antigual, resulta que nos casos de griesca no riego tienen más protagonismu las mucheres.

¿Sacaríamos d'aiquí la conclusión de que yía la presencia femenina la que fai que las relaciones seyan más agresivas? Non, nun podemos aceutar esta conclusión. Pero ¿nun sedrá más bien que los homes prefieren que seyan las mucheres las que faigan los l.labores del riego que tienen más problemas d'enfrentamientu? Ou, mechor, ¿nun sedrá que se prefier que seyan las mucheres las que vayan a las situaciones de griesca nel riego?

Vamos ver cada una de las estratexas ya intentaremos esplicalas nel so contestu particular.

La estratexa de cooperación nel riego yía perfeutamente esplicable. En fayendo en comuña'l banzáu, supónse que seguirá esi espíritu de cooperación nel trabachu. L'augua yía propiedá de los constructores del banzáu ya si dalguna familia quier regar ya nun yía p'asistir al trabachu común tendrá que pagar —antias con vinu, por exemplu, agora más bien con perras— a los que trabachan no banzáu.

La estratexa de la vecera nos praos del pueblu yía una conducta qu'atopamos razonable por demás: cuando la competición pol augua aumenta paez que nun hai mechor forma de solucionala que con un turnu de riego, fácil de faere porque s'usa'l SCR.

La estratexa de l'astucia yía mui interesante ya, tamién, especialmente intelixente. Como los praos de los val.les tán l.luenxe ya'l sistema de riego ta fragmentáu en muitísimos banzaos, yía mui difícil faer un turnu. Resultaría mui complicaao porque a lo mechor cada regante tien praos en seis ou siete banzaos distintos ya

entós sedría cuasi necesaria una computadora pa ser quien a armonizar tolos horarios. Tampouco yía fácil un espíritu de cooperación porque cada unu tien competidores de distinta clas a lo llargo de los más de venti quilómetros que miden los dous ríos de los valles. Al descartar tamién la estratexa d'enfrentamientu ya griesca polos costes sociales que tien, paez que la estratexa de l'astucia yía la que mechor permite solucionar los problemas del riego.

Pero ¿qué yía lo que pasa conas tierras de llabor? Como aquí hai un gran SCR ya las tierras tán más xuntas ¿por qué nun escocher una vecera que racionaliza l'usu ya salva las relaciones personales ya familiares? ¿Qué cousa mechor qu'una vecera?

Yía verdá qu'hai augua a esgaya. Pero tamién yía verdá que tol mundu quier regar a la vez ya naide quier asperar un día ou dous. Tamién hai que tener en cuenta que pol branu, especialmente hasta que termina la yerba, hai muitu trabachu que faere ya nun pue dexase la oportunidá de regar cuando a unu-lly interesa: resulta difícil seguramente adautase a un horariu impuestu por un "supervisor" imparcial, del que siempre tol mundu desconfía. Tamién hai que tener en cuenta que los productos agrícolas siempre piden más urxencia nos riegos: muita xente piensa que si dexa un día más las patacas ensin augua va terminar cono frutu.

Cada estratexa tien, entós, la sua razón de sere, ya tamién la tien la estratexa del enfrentamientu ya la griesca. No SCR pue practicase l'astucia, pero de manera escasa porque los puntos clave del SCR tán no pueblu ya a la vista de tol mundu, amás de tener una vixilancia continua. Faise, entós, "inevitable" recurrir a la griesca ya la pelea.

En cuantas a la participación femenina na estratexa d'enfrentamientu ya griesca la esplicación tien que sere de caráuter fundamente cultural. La mucher tien como un llabor propiu cuidar de derterminaos cultivos como la pataca, las berzas, la remolacha, etc. mientras que suel tar un pouquín más apartada de los praos, anque tamién trabacha nel.los tanto como los homes polo menos.

Amás, na nuesa zona cultural la mucher nun tien como rasgu definitoriu la imaxe de la mucher mediterránea nin outros atributos de fuera qu'agora s'espar-den cona cultura urbana. En realidá, nesta zona cultural yía la mucher la que controla económicamente la casa, la que decide más: nun tien el perfil de la mucher que tenga que se someter al home. Nos concechos ou xuntas de vecinos las mucheres son las más agresivas muitas veces ya pa dengún home yía negativo que seya la sua mucher la que lleve la iniciativa. Si pa regar hai que reñer ya enfrentase ¿quién yía más apropiáu que la mucher? Naide: efeutivamente, la mucher yía la tierra familiar, la casa, la representante de la estirpe común. Si dúas casas tán enfadadas, los paisanos pueden relacionase no bar, pero las mucheres tienen que mantener la marca (de distancia) ente los linaxes ya las señas d'identidá de cada familia.